

Intrudusaun

Iha Janeiru 2015, Unidade Justisa ba Feto no Labarik (*Women's and Children Justice Unit WCJU*) kontinua monitoriza kazu violénsia bazeia ba jéneru iha jurisdisaun Tribunál Distritál Dili. Iha edisaun ne'e, sumariza kazu 12 ne'ebé julga iha Tribunál Distritál Dili.

Husi kazu 12 ne'e, kazu 9 involve krime ofensa ba integridade fízika simples ho natureza violénsia doméstika, kazu 1 krime maus tratus ba menór, kazu 1 krime maus tratus ba kónjuje no kazu 1 involve krime abuzu seksuál ba menór.

Entre kazu hirak ne'e, kazu 2 tribunál kondena ho pena prizaun maibé nia ezekusaun suspendidu, kazu 1 kondena ho pena multa, kazu 4 tribunál halo adiamentu tanbá parte intersadu sira la kumpri notifikasaun, no kazu 5 seluk sei iha prosesu nia laran.

Iha kazu ne'ebé julga ho Nú. Prosesu: 72/14.TDD, JSMP hanoin katak faktu sira iha kazu ne'e prienxe elementu krime maus tratus ba kónjuje tuir artigu 154 Kódigu Penál ka ofensa ba integridade fízika grave. JSMP hanoin katak aktu hirak ne'e ho intensaun atu hamósu perigu ba lezada nia vida tuir artigu 146 letra (e) Kódigu Penál tanbá instrumentu ka materiál hirak ne'ebé arguidu uza hodi ezekuta krime ne'e iha potensia boot atu hamósu risku seriu ba lezada nia vida. Tuir lolos ministériu públiku no tribunál tenke halo alterasaun ba kualifikasaun krime ne'e atu asegura pena ne'ebé apropiadu tuir krime nia gravidade.

Iha parte seluk JSMP lova desizaun tribunál ba kazu ne'ebé julga ho Nú. Prosesu: 795/14.TDD tanba maske kazu ne'e hetan suspensaun, maibe tribunál mós aplika dever adisionál ba kondenadu atu kumpri durante períodu suspensaun nia laran. Ne'e importante atu kontribui prevene krime violénsia doméstika iha comunidade, tanba kondenadu sira bele konsiénte katak suspensaun ba prizaun nu'udar meu ida atu kontrola kondenadu durante períodu suspensaun ne'e nia laran,

Tuir mai deskripsaun sumáriu julgamentu ba kazu kompletu:

1. Krime ofensa ba integridade física simples ho natureza violéncia doméstika - Nú. Prosesu: 815/14.TDD

Kompozisaun tribunál : Singular
Juis : Dra. Zulmira da Silva
Ministériu Públiku : Dr. Reinato Bere Nahak
Defeza : Dr. Sebastião Amado (defensoria públiku)
Konkluzau : Adia

Iha 19 Janeiru 2015, Tribunál Distritál Dili adia prosesu julgamentu ba kazu ofensa ba integridade física simples ho natureza violéncia doméstika ne'ebé komete husi arguidu HS hasoru nia feen, iha Distritu Dili

Kazu ne'e tribunál adia ba iha 30 Marsu 2015, iha tuku 9:00 dadersan, tanbá juis titulár ba kazu ne'e sei lisensa maternidade.

2. Krime abuzu seksuál ba menór ho Nú. Prosesu: 817/14.TDD

Kompozisaun tribunál : Kolektivu
Juis : Dra. Jacinta Correia
Dra. Jumiaty Freitas
Dr. Antonio Helder do Carmo
Ministériu Públiku : Dr. Reinato Bere Nahak
Defeza : Dr. Manuel Sarmiento (defensoria públiku)
Konkluzau : Sei kontinua prosesu

Iha 20 Janeiru 2015, Tribunál Distritál Dili, hala'o rejulgamentu ba kazu krime abuzu seksuál ba menór ne'ebé komete husi arguidu AS hasoru lezada JFdA, iha Distritu Dili.

Ministériu Públiku akuza arguidu kontra artigu 177 Kódigu Penál kona-ba krime abuzu seksuál ba menór.

Antes ne'e, iha 4 Novembru 2014, tribunál kondena arguidu ho pena prizaun tinan 6 fulan 6, selu indemnizasaun sivil US\$500.00. Maske nune'e, tanbá juis internasionál ne'ebé nu'udar membru juis kolektivu ba kazu ne'e la konsege asina akordaun, tanba tenke kumpri rezolusaun Parlamentu Nasionál no Governu kona-ba espulsaun ba ofisial no asesor internasionál sira. Ho razaun ne'e, tribunál deside halo rejulgamentu ba kazu ne'e.

Julgamentu ba kazu ne'e taka ba públiku maibé tuir informasaun ne'ebé mak hetan husi ofisial justisa ba kazu ne'e katak depoisde julgamentu, tribunál marka fali agenda julgamentu ba leitura akordaun iha 2 Feveiru 2015 iha tuku 9 dadersan.

3. Krime ofensa ba integridade física simples ho natureza violéncia doméstika - Nú. Prosesu 0055/13.TDD

Kompozisaun tribunál : Singular
Juis : Dra. Jumiaty Freitas
Ministériu Públiku : Dr. Renato Bere Nahak
Defeza : Dr. Sebastião Amado (defensória públiku)
Konkluzau : Sei kontinua prosesu

Iha 22 Janeiro 2015, Tribunál Distritál Dili, julga arguidu CG ne'ebé komete krime violéncia doméstika hasoru nia oan NG, iha Distritu Dili.

Ministériu Públiku akuza katak iha 2 Feveiru 2013, arguidu tuku dala ida iha lezadu nia ulun no basa dala rua iha inus. Motivu husi akontesementu ne'e tanba arguidu husu osan US\$10.00 ba nia feen atu ba joga maibé la fó tanba ne'e mak arguidu nervozu tuku fali nia-oan. Aktu ne'e rezulta lezadu sofre bubu iha nia ulun no ran sai husi nia inus.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 35 Lei Kontra Violéncia Doméstika.

Iha tribunál, arguidu konfesa integralmente faktus husi akuzasaun, arepende nia hahalok no promete sei la komete tan krime hanesan iha futuru. Kazu ne'e akontese wainhira lezadu sei tinan 2.

Depoisde rona tiha deklarasaun husi arguidu, tribunál bolu lezadu atu konfirma faktus balun maibé tanbá lezadu la hatan tribunál nia pergunta no testamuña (lezadu nia inan) ba tiha ona Inglatera, tribunál deside kontinua ba alegasaun.

Iha alegasaun finál, ministériu públiku konsidera faktu hotu-hotu provadu tuir konfisaun arguidu nian, husu ba tribunál kondena arguidu ho pena prizaun tinan 1 suspende ba tinan 2.

Defeza haktuir katak arguidu konfesa, arepende nia hahalok, responsabiliza ba familia, tanba ne'e husu ba tribunál atu kondena arguidu ho pena prizaun fulan 6 suspende ba tinan 1.

Depoisde rona tiha alegasaun husi parte sira, tribunál marka fali agenda julgamentu ba leitura sentensa iha 2 Fevereiro 2015 iha tuku 9 dadersan.

4. Krime ofensa ba integridade física simples ho natureza violência doméstica- Nú. Prosesu: 635/14.TDD

Kompozisaun tribunál : Singular
Juis : Dra. Francisca Cabral
Ministériu Públiku : Dra. Lidia Soares
Defeza : Dr. Sebastião Amado (defensoria pública)
Konkluzau : Adia

Iha 22 Janeiro 2015, Tribunál Distritál Dili adia julgamentu ba kazu krime ho natureza violência doméstica ne'ebé involve arguidu DdC hasoru nia feen, iha Distritu Dili.

Kazu ne'e tribunál adia ba 7 Abril 2015 iha tuku 9 dadersan, tanbá ofisial justisa lahetene arguidu no lezada nina hela fatin. Too agora notifikasaun ne'ebé tribunál hasai seidauk intrega ba arguidu no lezada.

5. Krime maus tratus ba menor ho Nú. Prosesu: 19/14. TDD.

Kompozisaun tribunál : Kolektivu
Juis : Dra. Ana Paula Fonseca
Dr. José Maria de Araujo
Dr. Ivan Goncalves (juis estajáriu)
Ministériu Públiku : Dr. Vicente Brito
Defeza : Dr. Manuel Sarmiento (defensoria pública)
Konkluzau : Sei kontinua prosesu

Iha 22 Janeiro 2015, Tribunál Distritál Dili prejide julgamentu ba arguida POdS ne'ebé komete krime maus tratus ba menor hasoru nia oan feto PdS, iha Distritu Dili.

Ministériu Públiku akuza katak iha 19 Novembru 2010, arguida dudu lezada nia ulun ba parede no hodi garfu fai ba lezada nia orgaun seksuál, aktu ne'e kauza bubu iha lezada nia ulun, kanek no bubu iha lezada nia orgaun seksuál. Kazu ne'e deskobre husi doutor iha ospital hafoin testamuña NS (viziñu) lori lezada ba iha ospital hodi konsulta tanbá lezada isin manas. Kazu ne'e akontese sem motivu ne'ebé klaru.

Julgamentu ba kazu ne'e sem prezensa arguida no lezada nian tanbá sira ba tiha ona Indonezia.

Testamuña NS iha deklarasaun hato`o katak la hatene akontesementu ne'e maibe wainhira nia lori lezada ba halo tratamentu iha ospital, doutor mak deskobre lezada nia kanek, testamuña husu ba lezada se mak halo lezada nia isin kanek no bubu lezada hatan katak "*nia inan mak dudu nia ulun ba parede no fai ho garfu ba nia orgaun seksuál*".

Testamuña MDX (viziñu) mós depoimenta ba tribunál katak iha loron refere testamuña so hatene deit katak arguida ho nia laen mak diskuti malu, kona-ba lezada testamuña la hatene nia kondisaun hafoin testamuña NS fila husi ospital mak fo hatene ba testamuña MDX.

Depoizde rona tiha depoimentu husi testamuña sira, ministériu públiku husu ba tribunál atu fo prazu loron 3 hodi konsulta ho aktus depois kontinua ba alegasaun.

Bazeia ba pedidu ministériu públiku nian, tribunál marka fali agenda julgamentu hodi rona alegasaun husi parte sira iha 26 Janeiru 2015 tuku 9 dadersan.

6. Krime ofensa ba integridade física simples ho natureza violência doméstica - Nú. Prosesu: 72/14. TDD.

Kompozisaun tribunál	: Singular
Juis	: Dra. Francisca Cabral
Ministériu Públiku	: Dra. Ivonia Maria Guterres
Defeza	: Dr.Sergio Paulo Dias Quintas (defensória públiku)
Konkluzaan	: Kondena ho pena prizaun fulan 6 suspende ba tinan 1

Iha 27 Janeiru 2015, Tribunál Distritál Dili julga kazu violência doméstica ne`ebé komete husi arguidu AS hasoru nia feen, iha Distritu Dili.

Ministériu Públiku akuza katak iha 15 Novembru 2013, iha tuku 09:00 kalan, arguidu lori besi-kanu baku iha lezada nia matan fukun, lori baliu baku iha lezada nia kidun no lori mós baliu ko`a lezada nia kabun. Aktu hirak ne`e kauza lezada hetan bubu iha nia matan fukun, kidun no kanek iha lezada nia kabun.

Kazu ne`e akontese tanba arguidu husu ba lezada atu sira-nain rua ba buka xefe suku nia uma hodi rezolve sira-nia oan fetu nia problema, maibe lezada lakohi. Tanba ne`e arguidu halo ofensa hirak ne`e hasoru lezada.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 35 alinea b Lei Kontra Violência Doméstica.

Iha tribunál arguidu konfesa katak faktus ne'e loos hotu. Arguidu deklara arepente ba nia hahalok, foin premeiraves komete krime no promete sei la repete tan krime hanesan hasoru lezada iha futuru. Tanba arguidu konfesa integralmente ba faktus, ministériu públiku husu presindi (la presiza rona) depoimentu husi lezada.

Iha alegasaun finál, ministériu públiku konsidera faktus hotu-hotu provadu tuir konfisaun arguidu nian. Atu halo prevensaun ba krime ne'e la bele akontese tan iha futuru, ministériu públiku husu ba tribunál atu kondena arguidu ho pena prizaun fulan 6 suspende ba tinan 1.

Enkuantu defeza haktuir katak tanba arguidu konfesa, arepente nia hahalok, diak malu ona ho lezada no foin premeiraves komete krime, tanba ne'e husu ba tribunál atu fo pena ne'ebé kmaan ba arguidu.

Depoisde rona tiha alegasaun husi parte sira, tribunál konklui prosesu ne'e no kondena arguidu ho pena prizaun fulan 6 suspende ba tinan 1.

7. Krime ofensa ba integridade física simples ho natureza violencia doméstica - Nú. Prosesu: 795/14. TDD

Kompozisaun Tribunál	: Singular
Juis	: Dra. Ana Paula Fonseca
Procurador	: Dr. Vicente Brito
Defeza	: Dra. Agustinha de Oliveira (defensór estajiaría)
Konkuluzaun	: Kondena arguidu ho pena prizaun fulan 6 suspende ba tinan 1 fulan 6

Iha 27 Janeiro 2015, Tribunál Distritál Dili kondena pena prizaun fulan 6 suspende ba tinan 1 fulan 6 ho devér apresentasaun periodika ba polisia durante período suspensaun. Tribunál aplika sentensa ne'e, tanba arguidu CdC provadu komete krime violénsia doméstika hasoru nia feen, iha Distritu Dili.

Antes ne'e, ministériu públiku akuza katak iha 16 Novembru 2011, arguidu hodi ai-pedasuk baku iha lezada nia-ain, rezulta kanek no bubu. Kazu ne'e akontese tanba lezada hase arguidu ne'ebé konverse hela ho feto ida iha loja nia oin.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 35 Lei Kontra Violénsia Doméstika.

Iha tribunál, arguidu deklara katak nia la baku lezada ho ai-pedasuk. Maibe nia tuda ai-pedasuk ne'e ba parede mak ai-ne'e haksoit ka kati'ik kona iha lezada nia-ain. Arguidu

tuda ai-ne'e tanba lezada deskonfia arguidu ba fetu ne'ebé nia hamrik hamutuk iha loja oin. Arguidu deklararepente ba nia hahalok no di'ak malu ona ho lezada.

Aleinde ne'e, lezada mós konfirma katak arguidu tuda ai-ne'e ba parede mak haksoit ka kati'ik ba kona iha lezada nia-ain no kauza bubu. Lezada mós konfirma katak depoisde akontesementu ne'e sira di'ak malu fali.

Iha alegasaun finál, ministériu públiku haktuir katak bazeia ba konfisaun parsial hosi arguidu no konfirmasaun husi lezada, husu ba tribunál atu kondena arguidu ho pena prizaun tinan 1 suspende ba tinan 2.

Defeza argumenta katak arguidu arepente nia hahalok, di'ak malu ona ho lezada no foin primeraves komete krime, tanba ne'e husu ba tribunál atu fo pena ne'ebé justu.

Bazeia ba faktus ne'ebé produs iha julgamentu no sirkunstánsia hotu-hotu ne'ebé asociadu ho krime ne'e, tribunál konklui hodi kondena arguidu ho pena prizaun fulan 6 suspende ba tinan 1 fulan 6 ho devér apresentasaun periodika ba polisia durante período suspensaun. Tribunál mós kondena arguidu selu kustus judisiariu US\$20.

8. Krime ofensa ba integridade física simples ho natureza violência doméstica - Nú. Prosesu: 16/14.TDD

Kompozisaun tribunál	: Singular
Juis	: Dra. Ana Paula Fonseca
Ministériu Públiku	: Dr. Reinato Bere Nahak
Defeza	: Dr. José da Silva (defensória públiku)
Konkluzau	: Adia

Iha 27 Janeiro 2015, Tribunál Distritál Dili adia julgamentu ba krime violência doméstica ne'ebé komete husi arguidu CAC hasoru nia oan JG, iha Distritu Dili.

Kazu ne'e adia ba iha 8 Abril 2015 iha tuku 9 dadersan tanbá arguidu no lezadu kontinua la kumpri notifikasaun no polisia la ezejuta mandadu detensaun ho razaun ne'ebé la klaru.

9. Krime ofensa ba integridade física simples ho natureza violência doméstica - Nú. Prosesu: 798/2014/TDD

Kompozisaun Tribunál	: Singulár
Juis	: Dra. Fransisca Cabral
Ministériu Públiku	: Dr. Vicente Brito
Defeza	: Dr. Manuel Exposto (defensória públiku)

Konkluziun : Adia

Iha 28 Janeiro 2015, Tribunál Distritál Dili adia julgamentu ba krime violénsia doméstika ne'ebé komete husi arguidu ML hasoru nia feen, iha Distritu Dili.

Julgamentu ba kazu ne'e adia ba 3 Marsu 2015, tuku 11 dadersan tanbá arguidu la kumpri notifikasaun. Tribunál mós informa katak sei kondena arguidu ho multa kuandu arguidu la justifika nia falta iha loron lima nia laran no sei hatun despaxo mandadu detensaun atu asegura arguidu nia prezensa iha julgamentu.

10. Krime ofensa ba integridade física simples ho natureza violénsia doméstika - Nú. Prosesu: 673/2014/TDDIL

Kompozisaun tribunál : Singular
Juis : Dra. Francisca Cabral
Ministériu Públiku : Dra. Ivonia Maria Guterres
Defeza : Dra. Marcia Sarmiento (defensoría públiku)
Konkluziun : Kondena ho pena multa

Iha 29 Janeiro 2015, Tribunál Distrital Dili julga arguidu COG ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 30 Agostu 2013, iha tuku 10:00 kalan arguidu ho lezada diskuti malu tanba arguidu fila uma kalan sein razaun ne'ebé klaru.

Iha 31 Agostu 2013, maizumenus tuku 13:00 meudia arguidu lori be'e manas fakar ba lezada nia kanotak nune'e rezulta bubu no kanek. Kazu ne'e akontese tanba lezada la prepara han meudia bainhira arguidu fila husi servisu.

Ministériu públiku akuza arguida kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violénsia Doméstika.

Iha julgamentu arguida konfesa integralmente faktus husi akuzasaun, arepende nia hahalok no promete iha futuru sei la komete tan krime hasoru lezada.

Tanbá arguidu konfesa integralmente faktus iha akuzasaun, ministériu públiku husu atu la rona tan depoimentu lezada no testamuña sira.

Iha alegasaun finál, ministériu públiku konsidera faktus hotu-hotu provadu tuir konfisaun arguidu nian, arepende ba nia hahalok, nune'e husu ba tribunál atu aplika pena prizaun fulan 6 suspende ba tinan 1.

Defeza iha nia alegasaun husu ba tribunál atu konsidera sirkunstansia atenuante arguidu nian hanesan konfesa, hatudu nia arependimentu, diak malu ona, foin primeiravez komete krime, nune'e husu ba tribunal atu aplika pena ne'ebe adekuadu.

Depoisde alegasaun husi parte sira, tribunál imediatamente konklui prosesu ne'e no kondena arguidu ho pena multa US\$45, 00 no selu mós kusta judisiariu US\$10. Tribunál mos fiksa mós pena alternativu loron 70 kuandu arguidu la kumpri pena multa ne'e.

11. Krime Maus tratus ba kónjuje - Nú. Prosesu: 302/2014/TDD

Kompozisaun tribunál	: Koletivu : Dra. Jacinta Correia da Costa : Dra. Jumiaty Freitas : Dra. Albertina Neves (juis estajiáriu)
Ministériu Públiku	: Dr. Reinato Bere Nahak
Defeza	: Dr. Sebastião Amado (defensória públiku)
Konkluzau	: Sei kontinua prosesu

Iha 28 Janeiru Tribunál Distritál Dili hala'o julgamentu ba kazu maus tratus ba kónjuje ne'ebé komete husi arguidu HGS hasoru nia feen, iha Distritu Dili.

Ministériu Públiku akuza katak, iha 9 Fevereiru 2012 tuku 09:00 kalan, arguidu tuku dala ida iha lezada nia hasan, tuku dala ida iha kanuruk no tebe dala ida iha ain. Aktu ne'e rezulta lezada monu ba rai, dezmaia no mi-a'an.

Motivu husi akontesementu ne'e tanba familia husi lezada (feto-san) la konvida arguidu sira (mane-foun) ba han hamutuk.

Tuir mai iha 19 Fevereiru 2012 arguidu lori ai-sar baku dala haat ba lezada nia isin, baku dala rua iha kotuk laran no dala rua iha matan fukun. Aleinde ne'e, arguidu haruka lezada hakneak no bandu lezada labele kaer telefoni, bandu labele ba eskola no labele vizita mós lezada nia familia.

Motivu husi akontesimentu ne'e tanba arguidu haruka lezada ba foti album foto iha lezada nia-maun sira, lezada lakohi.

Iha Abril 2013 arguidu lori liman sikun fai iha lezada niaibun, kauza lezada niaibun ran. Kazu ne'e akontese tanba arguidu haruka lezada foti arguidu nia jaket maibe lezada lakohi.

Ministériu Públiku akuza arguidu kontra artigu 154 Kódigu Penál konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente ba faktus no konfirma ho akuzasaun hosi ministériu públiku. Tribunál konfirma ho lezada no iha audénsia ne'e lezada konfirma faktus balun no balun haluhan.

Arguidu mós deklara arepende ba nia hahalok, foin premeiraves komete krime no promete sei la komete tan krime hanesan hasoru lezada iha futuru

Iha alegasaun finál, ministériu públiku mantein ho ninia akuzasaun no husu ba tribunál atu kondena arguidu tuir krime ne'ebé nia komete.

Iha alegasaun defeza dehan arguidu konfesa integralmente ba faktus, komportamentu di'ak, agora di'ak malu ona ho lezada. Husi sirkunstánsia hotu iha kazu ne'e, husu ba tribunál aplika pena ne'ebé justu tuir tribunál nia konviksaun.

Depoisde rona tiha alegasaun husi parte sira, tribunál marka fali agenda julgamentu ba leitura akordaun iha 6 Feveireiru 2015, tuku 14:00 loraik.

12. Krime ofensa ba integridade fízika simples ho natureza violénsia doméstika - Nú. Prosesu: 169/2014/TDDIL

Kompozisaun tribunál	: Singular
Juis	: Dra. Jacinta Correia da Costa
Ministériu Públiku	: Dr. Vicente Brito
Defeza	: Dr. Manuel Exposto (defensória públiku)
Konkluzau	: Sei kontinua prosesu

Iha 26 Janeiru 2015, Tribunál Distritál Dili julga arguidu JDS ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 23 Dezembru 2014 kalan, arguidu dudu lezada nia ulun kona iha ai-kama nian. Motivu husi akontesementu ne'e tanba arguidu ba sosa sasan no fila kalan tanba ne'e mak lezada hirus.

Tuir mai iha 24 Dezembru 2014, arguidu kaer lezada nia ulun tuku ba parede kauza ulun bubu, lezada tanis no arguidu buti lezada nia ibun, atu lian labele sai. Arguidu mós lori tizora fai iha lezada nia orgaun seksuál, la kauza kanek no ran, maibé moras no mean deit.

Ministériu Públiku akuza arguidu kontra artigu 145 Kódigu Penál konjuga ho artigu 35 Lei Kontra Violénsia Doméstika.

Iha tribunál arguidu hili direitu silensiu no tribunál kontinua rona deklarasaun lezada. Iha lezada nia depoimentu kontinua mantein faktus sira iha akuzasaun. Iha oportunidade ikus iha audensia, arguidu konfirma fali faktus husi akuzasaun no deklara katak la'ós hodi tizora ho

intensaun fai lezada nia orgaun seksuál, maibé tanba sira-nain rua dudu malu mak tizora kona lezada.

Iha alegasaun finál, ministériu públiku haktuir katak tanba lezada konfirma akuzasaun, atu halo prevensaun ba krime ne'e, suspensaun mak nesasariu, tanba ne'e husu ba tribunál kondena arguidu ho pena prizaun tinan 1 suspende ba tinan 2. Enkuantu defeza iha alegasaun husi ba tribunál atu aplika pena ne`ebé adekuadu ba arguidu.

Depoizde rona tiha alegasaun husi parte sira, tribunál marka fali agenda julgamentu ba leitura sentensa iha 6 Feveireiru 2015 tuku 16:00 loraik.

Atu hetan informasaun liu tan favor kontaktu:

Luis de Oliveira Sampaio

Diretór Ezekutivu JSMP

Telefone: 3323883 |77295795

www.jsmp.tl

Facebook: www.facebook.com/timorleste.jsmp

Twitter: @JSMPTl